

INUIT ATAQATIGIIT

INATSISARTUNI



UPA 2014/76.1
13 maj 2014
Harald Bianco

Ulloq 1. januar 2015 aallarnerfigalugu ukiuni tulliuttuni sisamani KNR-mut aningaasaliissutit qaffannissaannut Naalakkersuisut peqquneqarnissaannik Inatsisartut aalajangiiffigissaattut siunnersuut. Aningaasaliissutit ilassutaat tusagassiortut immikkut qaqilerilluni radiomi, tv-mi qarasaasiamilu nutaarsiassalerinermut taamaallaat atorneqassapput (Inatsisartunut ilaasortaq Andreas Uldum, Demokraatit)

Siullermik Inuit Ataqatigiinnit Anda Uldum Demokratit qutsavigaarput siunnersuummut saqqummiussaanut!

Siunnersuuteqartup siunnersuumminut tunngavilersuutigivai KNR-ikkut allakaatittakkat soqutiginarlut itisilerlugit aallakaatinneqartarnissaannut aningaasaliinissaq. Siunnersuut tunngaviatigut isumaqatiginaraluartoq Inuit Ataqatigiinnit eqqarsarnartoqartipparput. Una siunnersuut akuersissutigineqassagalarpat, taava siunissami KNR-imut aningaasaliissutit maanna kr. 65 mill. tungaanoortut ima atorneqartalersinnaamata; ass. kr. 18 mill. -it ukununga atorneqassapput, kr. 6 mill.-it ukununga atorneqassapput il. il., taamaaliorneq Inatsisartutigut aalajangiiffigalugu.

Inuit Ataqatigiinnit isumaqarpugut, KNR-i nammineq siulersuisoqarluni ingerlasoq kiffaamngissuseqartariaqartoq aningaasaliissutit qanoq atornissaannut agguataarinissamut.

Aamma uagut naalakkersuinikkut suliaqartugut isumaqarpugut mianerisariaqaripput kiffaamngissuseqarluni sulinerlut akulerunnaveersaartariaqarnerput. Tusagassiortup suliassaraa paasissutissanik katersissalluni, pingaarnersiuisalluni taakkulu inuiaqatigiinnut saqqummiutissallugit. Tusagassiortut KNR-miikkuni allamiluunnit tusagassiorfimmuikkuni tassa suliassaanut ilaareerpoq. Tusagassiuteqarfiit kaammattuinnassavagut itisiliilluni tusagassiornerup pingaartinnerunissaanik.

Nunatta aningaasarnikkut maanna Naalakkersuisutigut ingerlatitaanera qiviaraanni, ukiunut tulliuttunut sisamanut katillugit kr. 12 mill. -inik siunertamut taamaattumut aningaasaliinissaq Inuit Ataqatigiinnit pissusissamisoorsorinngilarput.

Taamatut naatsumik oqaaseqarluta siunnersuut itigartitsissutigineqassasoq Inuit Ataqatigiit inner-suussutigaarput.